


# KOMIKANISELA NKOLO

 Matondi, Ndeko Neville. Esengo mingi ya kozala awa, Ndeko Neville, mpe na—na libaku malamau ya kofanda lisusu na bisika bileki Likoló oyo, kati na Klisto Yesu. Motángo ya bato etikálá kotungisaka ngai te, esepelisaka ngai nde ntango nyonso. Boyebi, koleka . . . Namiyokaka malamau koleka ntango nazalaka na motango moke ya bato, mpamba te yango nde oyo Lingomba ezali. Iyo, nazali na Likomi moko mpo na yango, elobi: “Banga te, Etóngá moke, ezali Tata na bino—na bino nde aseveli kopesa bino Bokonzi.” Mpe nakolinga . . . nde Etóngá moke wana oyo nalingi kotángama elongo na mokolo wana, oyo Ye alobelaki: “Banga te.” Mpe tozali na esengo mingi mpo na libaku ya koya awa na mpokwa oyo.

<sup>2</sup> Mpe nayaki te na likanisi ya koteya. Kala mingi te, ezalaki na moto moko oyo ayaki na ekuke, wana nazalaki koyekola, kolengeláká mwa maloba na mobimba mpo na mwa makomi oyo nalingi kosalela na mayangani oyo ekoya, ya Phoenix ná Tucson, mpe bipai nyonso wana. Mpe nazalaki mpenza koleisama na Molimo, boyebi, na makambo malamau ya Nzambe, na ntina na Etemelo ya nsuka, likambo moko etali *Etemelo ya suka*. Mpe mwasi na ngai ayaki koyebisa ngai ete moto moko ayaki kotala ngai, na—nasósolaki yango mpenza malamau te, bongo, nsima na yango, ee, alobaki: “Okozala na losambo na mpokwa ya lelo?”

<sup>3</sup> Nalobaki: “Nakanisi bongo.” Mpe nakóbaki, komeka kotikala kati na molimo ya oyo nazalaki kosala. Ayaki lisusu mpe alobaki ete ezalaki mobeli moko nde ayaki mpo na libondeli. Nalobaki: “Ee, na bongo, nakokende na losambo, ata bongo, bomoni, soki ezali likambo ya kobondela mpo na babeli.” Ngai, ntango nyonso, ezalaka . . . Boyebi, makambo yango ezalaka . . . tosendeli kolandela bango noki-noki mpenza, soki bato bazali na bokono ná bosenga. Moto nyonso oyo asílá kobela ayebi ndenge ya kosepela na oyo etali kobikisama na nzela na nguya monene ya kobikisa ya Nzambe. Mpe ezalaka mpenza likambo ya malamau mingi, litomba monene mpenza.

<sup>4</sup> Sikawa, Lomingu oyo ekoya, soki Nkolo alingi, soko Ndeko Neville ná bango nyonso bazali na eloko moko te ya special, nakanisaki ete na ntongo ya Lomingu oyo ekoya, na—nakolinga kopesa na bato liteya na ngai ya Nowéle, mpo épesa bango—épesa bango . . . Bamosusu kati na bango bautaka mosika, boyebi, ndakisa na Georgie mpe na bisika ndenge na ndenge, mpe ekopesa bango makoki ya kozonga na ntango malamau mpo básomba biloko na bango ya Nowéle mpe nyonso wana.

<sup>5</sup> Billy auti koya awa mpe ayebisi ngai, alobi ete Lomingu ekoya na mpokwa, liboso na liyangani, leki na ngai ya mwasi,

Delores, azali na mwa—mwa makabo mpo na bana, bakosala mwa manaka moko awa, boyebi, balingi kosala mwa lisano moko ya Nowéle liboso liyangani ébanda. Mpe nalobaki: “Ee, ekozala na mpokwa ya Lomingo, boye te?”

Alobaki: “Iyo.”

Nalobaki: “Ekotungisa ata moke te, na ntango wana.”

<sup>6</sup> Sikawa, bomoni, mokolo ya mibale oyo ezali butu ya Nowéle, na bongo soki. . . to mokolo ya mibale, na mpóso moko, ezali Nowéle. Boye, ekopesa bato motema móto, bomoni, na sima, basengeli kozonga epai na bango na butu ya Nowéle, mokolo ya Liboso, na bongo nakanisaki ete ná. . . iyo, mpóso mibale. Ya solo, kati na mpóso mibale nde. Boye, nakanisaki, ntango mosusu nakokaki koya na mpokwa oyo koyebisa bato, soki Nkolo alingi, mpe Ndeko Neville azali na likambo moko te ya special. Kútu, na momesano, nasepelaka kopesa nsango na ngai ya Nowéle na losambo, mpe nsango na ngai ya Pasika, mpe nyonso oyo Nkolo atii na motema na ngai koteya. Mpe Lomingo ekoya, soki Nkolo alingi, na ntongo ya Lomingo ekoya, nakoteya. . .

<sup>7</sup> Mpe ntina oyo nasalaka yango na ntongo na esika ya mpokwa, ezali mpo bato oyo bautaka mosika bazali na nsima ya nzanga mpo na kosala mobembo, mpo bákoka kozonga epai na bango, bomoni. Nalingaki kosepela kosala yango na mpokwa, nakanisi mpokwa ezali malamú koleka. Na—nasepelaka na mayangani ya mpokwa, ntango moi ekitaka, eloko moko ya ndenge wana. Nzambe na elanga ya Edene, epai ya Adama, azalaki koya na mpio ya mpokwa mpo na kosolola na Adama. Bomoni, ngai mpe nalingaka mayangani ya mpokwa. Kasi, mpe ndenge makambo ezalaka awa, ekozala malamú ete násala yango na ntongo, mpo bato bákoka kokende.

<sup>8</sup> Nazali kozongisa matondi ndenge tabernacle ezali koyeisama monene kino pembeni na biso mpenza awa, ndenge mwa esika ebakisami na yango. Nsima na kowelana mpe kobendana nyonso wana, sukasuka tozui yango kaka. Boyebi, mobange Ndeko Bosworth ayebaki kosekisa bato, alobaki: “Bebé oyo alelaka makasi mingi abendaka mpe bokebi mingi.” Boye, ezalaka bongo, tóloba, boyebi, na bongo, nakanisi ete kolela mwa moke mbala na mbala efutaka biso, bokanisi bongo te?

<sup>9</sup> Boye, nalingi kopesa longonya na Ndeko Anthony ná baninga na ye oyo bazali awa mpo na mizíki kitoko wana. Nautaki kokota mpe nayokaki yango. Mpe, boyebi, mindule yango ezali bakelelo. Nalingaki ete moko na bana na ngai, ata moko na bango, áyeba kobeta kelelo, na—na. . . mindule oyo bafúlaka mopepe.

<sup>10</sup> Becky abandaki kobeta piano, kasi akómi na mibu ya móseka, boyebi, elingi koloba, akómi na mposa ya kotika yango sikawa. Mpe—mpe abandaki. . . Molakisi alobaki ete

basengelaki kobanda na mizíki oyo bato mingi bayebi. Ezali te ete, sikawa, nalobi te ete. . . boyebi oyo nalingi koloba, na banzembo oyo ya ebandeli ya musique classique, mpe bongo na bongo, mpo bábanda mizíki ya losambo longwa na yango. Ntango akómi na mosanda na yango oyo eleki likoló, nde akómi komilobela: “Ee, nakotika na ngai.” Mpe na—na. . . bana mike bazali mindondo. Mpe, ata bongo, esengeli kozala na kobengama ya Nzambe, mpo na kobanda. Nabanzi ete ndeko na ye, Sara, oyo kuna, nde akoleka ye, ata bongo, mpe ayekoli naino eloko moko te. Boye, na bongo kobiangama ya Nzambe ezalaka malamukoleka na ntango ezali na likabo ndenge wana.

<sup>11</sup> Kasi nasepelaka na kelelo. Nazali koyeba lisusu ntango babulisaki tabernacle oyo, kuna na coin, bakelelo eyulaki ngonga mingi na moi awa: “Kuna na ekulusu epai Mobikisi na ngai akufaki, kuna mpo na bolimbisi ya masumu nalelaki, kuna na motema na ngai Makila etiamaki,” wana nazalaki kokotisa ndimbola ya mosala na ngai na kati ya libanga ya litúmu.

<sup>12</sup> Mpe nazali koyeba lisusu mpokwa moko na losambo ya ba-Methodiste ya Trinité, ntango mobange Molakisi Morrison. . . Mingi kati na bino baoyo bozalaki na eleko na ngai bozali koyeba lisusu Molakisi Morrison, mobange moko mosantu. Asbury ebúngisa moko na bato ya minene koleka uta eleko ya Asbury, ntango bakufelaki Molakisi Morrison, na mibu na ye, mobange moko ya mosantu. Nazalaki ntango nyonso kolinga koyoka ye koteya. Mpe nakendeki koyoka ye kuna na losambo ya ba-Methodiste ya Trinité kuna. Na mpokwa yango, bana mibali mibale babimaki na mwa balcon, ntango ngai ná mwasi na ngai tozalaki kokoma, bazalaki kotombola bakelelo na bango na likoló boye, ná mindule misusu wana, mpe bazalaki koyemba yango: “Kuna na ekulusu epai Mobikisi na ngai akufaki!” Ekulusu monene wana na likoló kobaluka-balukáká. Natelemaki na balabala mpe natombolaki maboko, nabandaki kokumisa Nzambe na mbala moko. Nakokaki komipekisa te.

<sup>13</sup> Ezalaka na boyoki moko boye na kati ya Moklisto oyo abotámi mbala mibale, ntango Ebetaka, likambo moko esengeli kosalema, nde nyonso esengaka. Oh, ngai. . . Eloko moko te ekokani na Moklisto ya kala. Ya solo. Nakoki kondima eloko mosusu te na esika ya kobíkéla na ngai, nakolinga kosombitinya yango te mpo na bozui ya mokili, to mokili mobimba, to système solaire mobimba ná nyonso wana, mpo na oyo Yesu asili koteya ngai na ntina na Ye moko.

<sup>14</sup> Mobali moko afandi elongo na biso, mbala nyonso oyo natalaka ye, motema na ngai epumbwaka. Ezali mobali moko namonaki ye kolia elambo, na mpokwa mosusu wana, atambolaka na nzete ya bibosono. Moto moko asilá koyebisa yo ete ozali lokola Oral Roberts? [Ndeko yango alobi: “Ee, ndeko, olobaki yango, kaka ntango nakotaki awa. Nazalaki kozela ete óyeba yango.”—Mok.] Nalobi na bino, mbala nyonso na. . . Bato

boni . . . Bosilá komona Oral Roberts, bino nyonso, tóloba. Azali mpenza lokola Oral Roberts! Esalemaki kaka ete natalaki kuna. Mpe na—namoni ete aleki Oral Roberts na molai mwa moke. Kasi kotala kaka ndenge asanoli suki na ye, ná mbúnzu na ye mpe elongi na ye, mpe azalaka ntango nyonso lokola moto monene, afandi mpe lokola Oral. Na boye, na—nakanisaka ntango nyonso: “Ndeko Oral?” Azali mpenza lokola ye.

<sup>15</sup> Ndeko Oral azali kobanda eteyelo moko boye ya Biblia kuna sikawa, nabanzi, to eloko moko ya ndenge wana. Nayokaki likambo yango mokolo wana. Ezali nini? [Ndeko Neville alobi: “Université.”—Mok.] Université. Iyo. Ndeko Carl Williams azali moko na bapesi toli na ye na likambo yango, na lolenge moko boye, nayebi mpenza te soki ezali nini.

<sup>16</sup> Sikawa, sikawa bóbosana te, mokolo ya Lomingo, soki Nkolo alingi, tokobanda, nakoteya nsango ya Pasika . . . to ya Nowéle. Na bongo, na—nazongisi matondi ndenge misala ya tabernacle ebandi. Na bongo, nabanzi ete ekozala kaka mpo na kobakisama na motángo ya bato te, kasi ekozala kobakisama na ngolu oyo Nzambe akopesa na losambo na biso, na likita na biso, na . . . likita te, kasi na eyanganelo na biso oyo tosangani elongo. Tolingaka yango.

<sup>17</sup> Mpe—mpe nalingi koloba boye. Nakozua ntango mingi te. Kasi, nazali na makambo mingi oyo nasengelaki koloba, kasi nakoloba yango te, ekozua ntango mingi mpenza. Kasi, nakolinga koloba boye, ezali eloko moko oyo nakoki koloba te. Ezali na makambo (moto nyonso azali kososola) oyo oyebi, mpe ezali na Nkombo na Nkolo, kasi okoki koloba yango te. Bomoni, osengeli kobomba yango mpo na yo moko. Bomoni? Kasi ezali likambo moko oyo ezali kokoma, eumeli mwa ntango, oyo elingi kosalema, oyo esali ete nálandela na kotaláká malamú Molimo Mosanto kosala katikati na bato na lolenge wana, mpe bango bayebi eloko ata moke te, bomoni, kasi komona Molimo Mosanto kosala na lolenge wana. Nakomonisa yango, soki Nkolo alingi, na ntango oyo esengeli. Sikawa, bomikanisela, elakisi ete Nzambe azali katikati na bango.

<sup>18</sup> Ndenge moto moko, nabanzi, ndeko, iyo, auti koloba kala mingi te, Ndeko Neville alobaki ete: “Nzambe atalaka mobulu na—na biso te, oyo ezalaka katikati na biso, bizaleli na biso ya mabe na miso na Ye.” Mpamba te, momoni oyo akendeiki konónge Yisraele, akokaki komona na liso ya nzoto oyo, ndenge ezalaki mobulu-mobulu, ndenge bazalaki kosala mabe mpe basengelaki kolakelama mabe. Kasi eloko oyo evéke azangaki komona ezali Libanga wana ebetami mpe Nioka ya Motako wana, bomoni, oyo ezalaki kolongola masumu. Boye, bomoni, ntango—ntango Balame atalaki Yisraele, amonaki ntina ya kolakela bango mabe. Bomoni? Kasi ntango Nzambe atalaki bango, Amonaki bolimbisi ya masumu. Alobaki: “Ozali lokola mpakasa.” Amen. “Nani akokótisa eloko moko na nzela na yo? Bahéma na yo ezali

búle mpe sembo!” Ndenge wana nde Nzambe amonaki bango. Bomoni? Ndenge bato bamonaki bango te, ndenge ba—bato ya lokumu bamonaki bango te; kasi ndenge Ye amonaki bango.

<sup>19</sup> Mpe, E Nzambe, tika ete ézala eteni na ngai! Tika ete ézala eteni na ngai, mpo nazali na eloko moko te, kati na ngai moko, oyo nakoki kotalisa. “Namemi eloko moko te na maboko na ngai, nakangami kaka na ekulusu na Yo.” Bomoni, yango nde nyonso oyo tozali na yango.

<sup>20</sup> Ee, oyo ezali mpokwa ya liyangani ya mabondeli, to mpokwa ya liyangani ya mabondeli te, kasi oyo ezali, tóloba, etonga ya kopalanganisa Nsango-malamu. To—tosepelaka kofandisa Liloba. Mpe ntango mosusu nakosepela koloba na bino mwa moke na mpokwa oyo. Mingi kati na bino, oyo bakolinga kozua Makomi. . . Ee, boyebi, likambo ya kokamwa, efungwami mpenza na esika yango, na eteni oyo nalingaki kotánga. Iyo, misie. Kokamwa. Ezalaki Bakolinti ya Liboso, mokapo ya 11, mpe mwa makambo oyo nakomaki awa, na esika moko awa, nazalaki kokanisa yango, soki nakoki komona yango sikawa, na Bakolinti ya Liboso, mo—mo—mokapo ya 11. Yango oyo, awa. Iyo, misie.

<sup>21</sup> Sikawa, liboso tóbelema na Liloba, tóbelema na Mokomi, bomoni, Oyo azali Liloba, mpo tókoka kosenga mawa mpe mapamboli na Ye wana tozali koyekola Ye Oyo azali Liloba. Tóbondela.

<sup>22</sup> E Nkolo Nzambe, oyo atondi na ngolu mpe mawa, Ye oyo andimaki kati na bileko, nsima na moto kosala lisumu mpe kotia libulu monene katikati na ye ná Yo, oyo ye moko akokaki kokatisa te mpo na kozonga. Abúngaki mpenza, na mobimba, kozanga nzela ya kozonga. Kasi Nzambe ya . . . oyo atondi na ngolu nyonso, andimaki kozua Esika na ye, mpe azongisaki ye. Yango esepelisaki mitema ya baoyo nyonso basílá koyébana na Yo, Nkolo, ndenge, na bolingo mpe ngolu na Yo monene, Ozuaki esika na ye! Mpe kaka ndenge touti kotalisa yango na maloba, Nkolo, ezali likoló na Oyo-ezui-esika yango nde biso totaleli na mpokwa oyo, Ye Oyo akufaki na esika na biso basumuki, ete Moyengebene Oyo akamataki likoló na Ye bozangi boyengebene na biso. Ezali na Ye nde biso totii motema.

<sup>23</sup> Sikawa, topusani na lokumu nyonso na Liloba na Ye, wana togumbi mitema mpe mitó, na limemia, botosi mpe botondi. Mpe kosenga ete Ótindela biso na mpokwa oyo, ngolu, na nzela na Molimo Mosanto, mpe Ópesa biso li—Lipa ya Bomoi oyo tosengeli na yango mpo na kosunga biso. Oyebi mpenza oyo tosengeli na yango, mpe toyebi ete Olakaki ete soki tosengi, tokozua.

<sup>24</sup> Tolingi kokanisa, na mpokwa oyo, Nkolo, bato nyonso oyo toyebi ete bazali na bokono mpe na bosenga, ete ngolu na Nzambe épesamela bango na kofuluka mpenza. Mpe, Tata,

tobondeli mpo na baoyo basili kokweya, mpo lói oyo ekoya ékundolisa na mitema na bango, ete bisika oyo bazaláká liboso mpe basili kokweya libanda ya etando ya boyokani na Yo. E Nzambe, tobondeli ete bázonga (sala yango, Nkolo), bázonga na eyanganelo, na lo—Losambo ya Bana ya liboso, bázonga na esika oyo ngolu mpe mawa ezali, ná bolingo mpe boboto, mpe lobiko ya elimo na biso, molimo na biso mpe banzoto na biso. Sala yango, Nkolo. Pambola Liloba na mpokwa oyo. Pesa biso nyonso makasi, mpe pesa biso mapamboli na Yo, wana tosengi yango na Nkombo na Yesu. Amen.

<sup>25</sup> Sikawa, mpo na mwa ntango moke kaka, nakolinga kobenda bokebi na bino na Bakolinti ya Liboso, mokapo ya 11, molongo ya 23, ya 24 mpe ya 25.

*Mpo ete yango ezuaki ngai epai na Nkolo mpe epesaki ngai bino ezalaki ete, na butu wana ekabamaki ye, Nkolo Yesu akamati lipa:*

*Mpe esili ye kotonda, abuki yango, alobi ete, oyo ezali nzoto na ngai mpo na bino: bosalaka boye mpo na ekaniseli na ngai.*

*Bobebe bongo na kopo, nsima na kolia, alobi ete, Kopo oyo ezali kondimana na sika kati na makila na ngai: bosalaka boye mbala na mbala ekomela bino yango mpo na ekaniseli na ngai.*

<sup>26</sup> Soki nasengeli kopesa motó ya liteya na eteni moke oyo nalingi kolobela, ekozala: *Komikanisela Nkolo*. Eyokanaki lokola mpokwa oyo...to nsango oyo esengelaki koteyama Lomingo eleki, ntango toliaki elambo ya Nkolo. Kasi nalingi kolobela yango na mwa ndenge mosusu, mpo na ntango moke, wana tozali kosangisa makanisi na—na biso elongo, mpe kokumbamela Nkolo.

<sup>27</sup> Tokokaki, na ntembe te, kobanda na mesa ya Nkolo, mpo ezali esika malamumu oyo biso nyonso tozali komikanisela. Komikanisela Nkolo na mesa na Ye, yango mpenza nde nkoma yango elobeli. Kasi, ezali, Polo alobaki ete tosengeli kokamata kopo mpe—mpe komela ma—makila, mpe kolia lipa ya kasher, na ekaniseli, mpo mna komikanisela oyo Asalaki mpo na biso. Mpe na—na kosaláká yango, bokolinga te kokómisa yango eloko moko ya momesano, ya mokolo na mokolo; bokolinga mpenza koya, komikaniseláká Nkolo. Bomoni? Mikaniselaka ete ezalaki ngolu na Ye mpe mawa na Ye, mpe bobele yango nde epesi yo elikia bobele moko oyo ozali na yango. Ata okotikala kosala eloko nini, ezali na eloko moko te, esika moko te, oyo ekoki, na lolenge moko boye, kopusana pembeni na oyo Klisto asalaki mpo na yo.

<sup>28</sup> Nabikeli likambo moko ya mawa na mpóso oyo, ata bongo, nakoki kobenga yango likambo ya nkembo, Nakundi ndeko moko oyo azalaki elongo na biso awa. Mpe mingi kati na bino bayebi likambo yango. Ezalaki Ndeko na biso ya mpiko Rogers,

Busty Rogers, ndenge tozalaki kobenga ye, Everett. Mpe Ndeko Banks Wood oyo azali awa, ná Ndeko Sothmann, tokendeki elongo na matánga yango.

<sup>29</sup> Mpe—mpe nakendeki kotambola na motuka, na kati ya neige, na esika oyo nakundáká ye mbala ya liboso, eleki pene na mibu ntuku mibale na mitano. Na ntango wana, ntango nakundáká ye, ezalaki na kati ya mai ya potopoto, na Nkombo na Nkolo Yesu Klisto. Ntango tozalaki koleka na gbagba ya kala, oyo toyebi malamuna kuna, na Totten Ford, nazalaki kosolola na bandeko na ngai, nalobaki: “Mokolo moko, ntango motei moko ya denomination atelemisaki hema moko ya—ya monene kuna, alobaki: ‘Mwa moto ya liboma wana na lingomba Batiste, oyo azali kobatisa bato na Nkombo na Yesu Klisto,’ alobaki, ‘soki moto moko abatisami ndenge wana, akoyambama kutu te na kati ya hema na ngai.’”

<sup>30</sup> Na eleko yango, esalemaki ete bato mosusu bafandaki kuna oyo basilaki kobatisama na Nkombo na Nkolo Yesu, ezalaki Ndeko George Wright ná libota na ye. Bango. . . Eloko bobele moko oyo bakokaki kosala ezalaki kozonga lisusu kuna te.

<sup>31</sup> Boye, mokolo yango, na mwa mokolé yango, oh, autaki kotika liyangani na ye, ayaki kotala, tóloba, likambo oyo ezalaki kosalema, mpe bato ya eyanganelo na ye bazalaki wana. Mpe ngai nakómaki na esika yango. mvula eutaki kobeta likoló na mwa bangomba kuna, mpe mai ya potopoto ya bitando yango etelemaki na nse, mwa mikelé yango ekómisaki Ebale ya Bleu potopoto mingi. Nakotaki na kati ya mai, kino na lokéto. Mpe ngai. . . Moko na bayangeli misolo, to na basungi, kútu, apesaki ngai Biblia, mpe natángaki eteni oyo Petelo, na Mokolo ya Pantekote, alobaki: “Bóbongola mitema, moko na moko na bino, mpe bóbatisama na Nkombo na Yesu Klisto mpo na bolimbisi ya masumu, mpe bokozua likabo ya Molimo Mosanto.”

<sup>32</sup> Ezalaki mokolo wana nde Georgie Carter azalaki ya kolala wana, azokomekáká kotombola maboko, atikalaki bobele na kilo pene na ntuku mibale, autaki kosala mibu libwa na sanza mwambe na mbeto ya maladi, kozanga koningana. Mpe bandeko na ye, losambo epai azalaki kosambela, balobáká, soki moto ayei na liyangani na ngai, bakobengana ye na bondeko ya losambo na bango. Na bongo, ezalaki na mpokwa moko wana nde ye abikisamaki na mbala moko. Na bongo alingaki kobatisama lokola mwana mwasi ya moke wana Nail, oyo azalaki wana; oyo namónáká na emononeli, mpe bino boyebi lisolo yango, maboko ná makolo na ye ezalaki ya kozonga nsima; nakotaki na emononeli mpe na nguya ya Molimo, natielaki ye maboko, abimaki mpe abikisamaki. Na bongo, ye mpe azalaki kosambela kuna. Ee, ezalaki lingomba Metodiste. Motei ya Metodiste, Ndeko Smith, azalaki moto oyo atelemaki na libongo elongo ná eyanganelo na ye.

<sup>33</sup> Mpe nabandaki kobatisa na libatisi ya Biblia, ya Baklisto. Mpe pene na ngonga oyo nasilaki kobatisa bato mitano to motoba, na mbala moko milongo ya bato ekatanaki, kuna na mwa ngomba. Etonga ya ba-Methodiste yango bakitaki, ná bilamba na bango ya kitoko, mpo na kobatisama na Nkombo na Nkolo Yesu. Moko nsima na mosusu, basi oyo balataki bilamba kitoko ya eté, bazalaki kokota na kati ya potopoto wana, bazalaki kopangusa mpisoli na elongi, mpe kosukola ngóla na bibebu, bazalaki koya ko—koyambola—koyambola mpe—mpe kobatisama.

<sup>34</sup> Mpe na kati ya bato yango, mobali moko ya makasi, ya mapeka milai, na suki bakátá mokuse lokola sodá American, elongi monene, engambe mobali, ayaki wana, alati kazaka na ye ya kitoko ya bléu. Alobaki: “Ngai mpe nazui mokano na ngai.” Ezalaki Busty Rogers, kozanga ete moto moko áyebisa ye eloko moko. Kuna nde epai nakunda ye na Nkombo na Nkolo Yesu Klisto, kokokana na eyambweli na ye.

<sup>35</sup> Na mpóso eleki, natiaki ye na nsé ya mabelé na Milltown. Nateyaki likoló na: *Kobonga Be Ya Lisekwa*. Nazalaka missionnaire, mpe namóná banzambe ya ndenge na ndenge mpe ba-philosophe; yango nde nyonso oyo yango ezali, libanda na Boklisto, ezali na yango kaka philosophie, ndenge bandimaka oyo, oyo wana to oyo mosusu. Kasi Mokeli monene Oyo asalá bokelami! Mokeli moko asengeli kozala, soki bokelami ezali. Mpe soki bokelami ezali, ekelamaki na Mokeli moko. Mpe mosala ya moto nyonso etalisaka ye moto moko yango. Soki azali mosali malamumu ya mabaya, asalaka mosala malamumu, atongaka. Mpe soki azali mecanicien ya malamumu, asalaka mosala malamumu. Mosala na yo etalisaka bobele yo moko. Mpe bokelami ya Nzambe etalisaka Nzambe. Mpe Nzambe asalaki eloko nyonso na ntina. Mpe eloko nyonso oyo ekokisaka ntina ya Nzambe, soki ekufi, ezali na lisekwa. Bótángela ngai eloko moko mpamba. Mpe nalobelaki biloko ebele, ndakisa, bafelele ná banzete.

<sup>36</sup> Mpe ndenge moi ebimaka na ntongo, lokola bebé oyo auti kobotama, ezalaka ya kolemba, mwese na yango. Pene na ngonga ya zomi, ekómi monzénga. Na midí, ekómi kongenga na makasi na yango nyonso, na kitoko ya bomwasi to ya bomobali. Mpe pene na ngonga ya mibale na nsima ya nzánga, ekómaka lokola ngai, tóloba. Na nsima, pene na ngonga ya mitano na nsima ya nzánga, ekómaka lokola nkóko, ekomi kolala. Mpe sukusuka mwése na yango esilaka mpe elimwe na mabelé, mpe ekufi. Wana nde nsuka na yango? Ekokisi ntina ya Nzambe. Ezalaki kosekwisa bomoi ya milóna, wana ezalaki koleka na mabelé. Milóna nyonso oyo ekufaki na mobu eleki, esekwisi yango. Wana nde nsuka na yango, ntango ekokisi ntina ya Nzambe? Esekwaka lisusu na ntongo oyo elandi, ná bomoi ya sika! Nzete nyonso esala ndenge moko, biloko mosusu nyonso, biloko nyonso, sanza,



minzoto, système solaire, biloko nyonso elakaka.

37 Mpe soki moto akokisi ntina ya Nzambe, lisekwa moko ezali, na ntembe ata moke te. Eloko bobele moko oyo yango esengeli kosala, ezali ete, Nzambe azali nde kozela ntango, kaka ndenge Azali kozela sikawa.

38 Nkasa ya minene esili kokweya longwa na banzete, esilaki kokweya, kútu. Na ntango lángi ya motane, ya mai ya pondu, ya bulé, ya mwa moindo, ya ndenge na ndenge na etando ya mabelé, epai wapi lizalisami ya Nzambe elalaki ya kokufa na nse na yango, Nzambe alonaki milona na Ye. Kasi Ayebi ete soki Aloni milona, lisekwa moko ekosalema na eleko ya printemps! Mokili esengeli bobele kozunguluka na nzela na yango kino étandama lisusu ná moi, mpe ekosekwa lokola bafelele ya matanga.

39 Bólobaka ata moke te ete: “Oyo nde nsuka,” nkasa mpe, oyo ekauki na nzete, elobaka te ete yango nde nsuka. Eloko bobele moko oyo esengeli kosala ezali, kozela ete libungutulu ya ntango ya Nzambe ézunguluka, kino na ntango ya boyei ya Mwana na Nzambe. Mpe ekelamo nyonso ya bomoi, oyo etikálá kokufa kati na Klisto, ekosekwa. Liboso na Ye, komikanisela Ye. Oh, ntango nakokóma na nsuka ya nzela na ngai, nalingi kokufa Liboso na Ye, komikaniseláká Ye, ete Azali lisekwa mpe Bomoi. Azali Oyo wana.

40 Na nsima, tokokóma na mesa na Nkolo. Mesa na Nkolo, ndenge nasílá kolimbola yango awa liboso, ezali te... Tondimaka ete oyo tobengaka “Elambo” ezali—ezali kolia lipa. Totiaka oyo ya mabe—oyo—oyo ya mabe... Totiaka eloko ya malamumu na esika ya mabe. Ezali lipa te nde ezali na ntina, ezali vinyo te nde ezali na motuya, oyo wana ezali lipa kasher mpe vinyo. Kasi eloko ya motuya ezali, ezali, *elambo* etalisaka “kosolola na,” mpe, wana ozali kosolola na Ye, komikanisela Ye. Nakanisi ete ezalaka ntango ya kopambolama koleka na mayangani. Bomoni? Ngonga moko na moko ya bomoi na biso esengelaki kozala elámbo

41 Elambo ná Nkolo ezali lokola esika ya mai na kati ya esobe. Ezali lokola liziba na nsé ya etima, epai oyo moto na—na mobembo azali koleka, atele mi mpe ameli mai kino ásilisa mposa na ye. Yango nde komikanisela Nkolo. Koya na molongo ya mesa na Ye, epai moleki nzela oyo—oyo afandi awa na mokili na biso, elongo, tókoka koya na mesa na Ye, mpo na komela mapamboli na Ye, ya ngolu na Ye mpe ya Liloba na Ye, kati na bandeko zinga-zinga na Liloba na Ye, kino mposa ya mai na elimo na biso éсила. Na nsima tótika esika yango ya kokumbamela, wana tozui mwa mpio, mposa esili; tobimi mpo na kokutana lisusu na mikakatano ya lisobe, na mikakatano ya esobe ya bomoi. Iyo, esika ya mai na kati ya esobe, komipesáká mwa mpio, komilendisá, ntango tozali na mposa ya mai.

<sup>42</sup> Esengelaki kozala bongo ná mosambeli nyonso. Esilisaka mpos-. . . Ezali bongo ná mosambeli nyonso ya solo, ete bayokaka mposa makasi ya koyángana. Eloko moko ya—ya Bonzambe ezalaka na ntina na bondeko, etindámá na Nzambe, mpe ezalaka bulee, mosantu. Mpe bayengebene bazalaka na mposa na yango.

<sup>43</sup> Ndenge David alobaki, ete “elimo na ye ezalaki na mposa ya Nzambe, ndenge nganzi eyokaka mposa ya mokele ya mai”. Mwa nganzi oyo ezoki, oyo bambwa ya bokila babendi mwa mosuni na mopanzi na yango, mpe ezali—ezali kolongwa na esika yango. Mpe eteleme, ékomela mpema mpe kokengeláká. Kolukáká koyoka nsolo na eyokeli oyo Nzambe apésá yango, epai wapi ekoki koyoka nsolo ya mai na ntaká ya bakilometre. Mpe etomboli mwa motó na yango likoló na mopepe, wana bomoi ezali kotika yango na nzela ya makila oyo ebimi. Mpe eyebe ete soki ekoki kokóma na liziba yango, ekoki kotikala na bomoi. Eloko moko te ekokanga ye na ntango wana. Soki akoki kokóma na esika ya mai, akobulunganisa bambwa nyonso oyo bakoki kolanda ye, mpo ayebe ete a—asili komona liziba lipesaka bomoi.

<sup>44</sup> Mpe ntango lingomba ekómaka na esika wana, na esika oyo Klisto akómaka na motuya monene mpo na biso na lolenge ete tokómaka na mposa ya koya Liboso na Ye, mpe elongo ná bamoko na bamosusu, ezali Lisungi oyo epesaka Bomoi. Molimo mabe moko te ekoki kosimba yo. Ata liwa yango moko elongami wana. Oh, oyo nde elikia! Oyo nde esika! Komipesa mwa mpio. Mpe, na kosaláká bongo, tomikaniselaka ete Klisto nde Oyo Asalaki ete ékoka kosalema mpo na biso. Ye nde Oyo Asalaki makambo oyo mpo na biso, tosengeli komikanisela Ye. Mpamba te, bómikanisela, kala, tozalaki bapaya mpe tozangaki Nzambe, bato na Mabota, tomemamaki na banzambe ya bikeko oyo elobaka te. Kasi, bómikanisela, Klisto akufaki mpo na Bayuda te, kasi mpo na bikelamo nyonso ya libota ya Adama oyo ekweyaki, nde Klisto akufaki.

<sup>45</sup> Wana toyei mpo na kokanisa Ye lisusu na liziba na Ye ya—ya bondeko, e—esengelaki kokundolela biso ntango oyo Yisraele baalaki na mobembo na bango. Mpe bakómaki, nzokande na kati mpenza ya molongo ya mosala, na nzela na bango longwa Ezipito kokende na kokangolama na bango, na mboka ya elaka, mpe, na kati mpenza ya kosala mosala na bango, bazangaki mai. Mpe kotala bisika nyonso, ezalaki ya kokauka, nyonso. . . na nse ya mwa ngomba nyonso oyo esengelaki kozala na maziba, ata moko ezalaki te. Mpe bakómaki kokufa na kati ya lisobe. Na bongo tala Libanga emonanaki, Mose abetaki Libanga yango mpe longwa na yango mai ebimaki mingi. Mobali nyonso ná mposa ya mai, mwasi nyonso ná mposa ya mai, mwana, to ata nyama nyonso ná mposa ya mai, ekokaki komela mai mingi.

<sup>46</sup> Ndenge Yoane 3:16, likomi ya wolo oyo na Biblia, elobi: “Mpamba te Nzambe alingaki mokili mingi, Apesaki Mwana

na Ye ya likinda, mpo moto nyonso oyo akondima (akondima, akosolola, akomikanisela Ye) akokúfa te, kasi akozua Bomoi na Seko.” Komikanisela ete Klisto azalaki Libanga na biso oyo ebetamaki, mpo na kobikisa mokili oyo ezali kokufa, moto ya Mabota oyo azali kokufa, Moyuda oyo azali kokufa, mokili oyo ezali kokufa. Klisto apesaki Bomoi na Ye na boike, mpo moto nyonso oyo azalaki na nzala mpe na mposa, ndenge mosakoli alobaki: “Bóya na liziba, kosomba epai na Ngai miliki mpe mafuta ya nzoi ya ofele.” Bóya, mpo ezali elambo, bóya komikanisela Nkolo.

<sup>47</sup> Nakoki kokanisa likambo ya komikanisela Nkolo lisusu na esika ya mpio, na libulu oyo ebengamaki *Beerelahai-royi*, oyo, na lokóta ya Baebele, elingi koloba: “Libulu ya Ye oyo azali na bomoi mpe azali komona ngai.” Agar, asósolamaki mabe, atako na kati ya nzela na ye ya mosala. Asósolamaki mabe, asambisami mabe, mpe aboyamaki, ná esika ya kokende te, ná mwana akómi pene na liwa, mpe mai na molangi esilaki. Mpe mwana yango azalaki kolela. Bobebe motema ya mama nde ekokaki koyeba ndenge esalaki, koyoka kolela wana na mposa ya mai, wana mwa lolemo na ye evimbaki, bibebu na ye ekaukaki, mpe bebé na ye ákolembáká miníti moko na moko. Abwakami libanda, na kati mpenza ya nzela na ye ya mosala, esika ya kokende ezali te. Amipimelaki komela, na lolenge ete afinaki litangá ya suka likoló ya mwa bibebu ya bebé oyo ekaukaki. Na bongo mai na mbeki yango ekaukaki, atiaki yango mpe akobaki kotambola. Mwana yango azalaki kolela na mposa ya mai, mpe abandaki kolemba se kolemba; mpe azalaki mwana na ye bobele moko.

<sup>48</sup> Na ntembe te, motema na ye oyo eyebi likambo te, ezalaki kobélela: “E Nzambe, nasali nini? Nasali nini?” Mpe akokaki koyika mpiko te komona mwana yango kokufa na maboko na ye, na bongo alálisaki ye na nse ya mwa nzete. Mpe akendeki mwa mosika, na ntaka ya kobeta litimbo, tóloba metre mokama to koleka, mpe amonaki mwa nzete moko, afukamaki mpe abandaki kolela. Mpamba te azalaki komituna: “Mpo na nini?” Soki asalaki likambo ya malamau, mpo na nini likambo yango ekómelaki ye? Mbala mingi tokanisaka bongo mpo na maladi mpe bampasi na biso, bomoni, kasi ntango mosusu nyonso wana esalemaka mpo na kotalisa ngolu mpe mawa. Wana azalaki kokanisa, ayokaki mwa kolela yango, na mposa ya mai, sukasuka eyokanaki lisusu te.

<sup>49</sup> Ayokaki Mongongo moko koloba mpe alobaki: “Mpo na nini ozali kolela? Ozali kolela na ntina nini?”

<sup>50</sup> Atombolaki miso, mpe amonaki libulu ya mai yango kotoka. Oyo liziba epesaka mpio mpenza! *Beerelahai-royi*, ekoki kozala ete nalobi yango malamau te. B, e mibale, r-l-a-h-a-i-r-o-y-i, elingi koloba: “Libulu ya Ye oyo azali na bomoi mpe azali komona ngai! Ye oyo akoki kokufa te! Melekisedeke! El Shaddai! Ye oyo azali na bomoi mpe azali komona ngai, ayebi bamposa

na ngai, Akaniseli ngai. Mpe kuna Akaniseli ngai ntango ngai namikaniselaki Ye, mpe nayebi ete Azali na bomoi mpe Asáli ete mai ébima awa na lisobe, na libulu oyo.”

<sup>51</sup> Oh, soki tokoki kosalela yango mpo na liteya ya ngonga moko sikawa, mpo na lelo, wana lisobe ya mangomba, ya ba-denomination, mpe—mpe ya ba—ba—batei ya Nsango-malamu ya bomengo mpe ya—ya makambo ya mokili oyo bamikotisi, basali ba-dénomination mpe bakabwani-kabwani.

<sup>52</sup> Na nsima kokanisa ete ezali lisusu wana na mpokwa, libulu na Ye oyo azali na bomoi mpe azali komona ngai. Yango nde komikanisela Klisto esengelaki kolakisa mpo na mosambeli. Iyo. Oh, asósolamaki mabe mpe aboyamaki. Yesu alobaki, ntango Azalaki awa na mokili ete: “Nazali Mai na bomoi, Nazali Mai na Bomoi.”

<sup>53</sup> Mpe nalingi kolobela mwa likanisi mosusu awa, oyo eyeli ngai na makanisi. Ntango Yesu asambisamaki, mpe ezalaki na ntina mosusu te, bobele mpo na kotiolama, na . . . Batindaki Ye longwa epai ya Pilate kino epai ya Erode. Sikawa, Pilate azalaki na ntina ya kosala bongo te, mpe, boyebi, ndenge amekaki kosukola maboko mpo na kolongola yango. Kasi na ntango kaka ekómi na maboko na yo, osengeli kozua mokano. Okoki kotindika yango epai ya moto mosusu te. Ekómi likambo na yo, yo lokola moto moko. Kasi Ye—Ye atindamaki epai ya Erode, kaka mpo—mpo bá—bátiola Ye, mpo Ayebanaki mpenza lokola mosali bikamwa mpe nyonso wana, mpe Asilaki koboyama na lingomba. Boye Pilate ye moko, amilobelaki akotinda Ye kaka epai ya Erode, mpe ntango mosusu elingaki kosilisa kowelana ya kaka oyo bazalaki na yango, moko na mosusu.

<sup>54</sup> Na boye bamemaki Yesu na ba-balabala mpe na bisika yango, sukasuka Akutanaki na esambiselo ya likoló, epai ya Erode. Mpe ntango Akutanaki na Erode, mpe Erode azwaki libaku na ye bobele moko! Ndenge nini moto akoki kozala zoba bongo? Soki Erode áyebaka ete wana liboso na ye ezalaki nde kokokisama ya oyo mosakoli nyonso ya Baebela asiláká kosakola, oyo mokili ezaláká na mposa makasi, yango nde ezalaki liboso na ye, kokokisama ya oyo bato na bwanya mpe basakoli nyonso batikálá kosakola. Libaku malamau ya kotondisa motema na ye ya masumu na ngolu mpe mawa. Azalaki mpenza zoba!

<sup>55</sup> Ata bongo azalaki zoba lokola bato ya lelo te, oyo bapesameli libaku ná likambo yango moko, mpo biso tozui lisusu mibu nkoto mibale ya malakisi na Ye, ya mawa na Ye. Kasi Erode a—asalaki mpenza bozoba, ntango atelemaki liboso na Ye mpe atikálá kosenga Ye ngolu mpe mawa te, atikálá kosenga bolimbisi ya masumu te. Atikálá koyeba te ete liboso . . . Nandimi te ete mobali yango asósolaki soki oyo azalaki liboso na ye azalaki Moto yango. Tótika yango ékota malamau mwa moke. Mpamba te,

Moto yango azalaki te na—na nkombo ya lokumu ya bato minene, ya bibongiseli mpe—mpe ya masangá ya ndenge na ndenge, mpe nyonso wana, oyo Azalaki kati na yango. Azalaki na lokumu ya ndenge wana te.

<sup>56</sup> Kasi Azalaki na yango, epai ya bato oyo bayebaki Biblia mpe bayebaki elaka. Mpe bótika nábeta nsete mwa makasi koleka, baoyo babongisámáká liboso mpo na Bomoi na Seko, basósolaki yango kaka ntango Atelemaki kuna.

<sup>57</sup> Kasi Erode ayekoláká likambo yango te, atikálá koyeba yango te. Mawa mmpenza. Nyonso oyo basakoli balobáká na mibu nkóto minei, kokokisama yango, ya kolela ya mokili ezalaki liboso na ye. Kokokisama yango nyonso ezalaki liboso na ye. Mpe nakoki lisusu koloba boye, tokoki kokanisa ete azalaki zoba ya nobali, mpo azuaki mokano moko ya bozoba, mpamba te, bótala ete atikálá kosenga Ye mawa te. Asengaki Ye ete—ete ásepelisa ye. “Oh, nayokaki ete Ozali mo—mosali bikamwa.” Asengaki ete básepelisa ye, na esika ya kosenga mawa.

<sup>58</sup> Yango nde mokili ezali kotalisa lelo, kaka mokano oyo Erode azuaki, ntango bamonaka Klisto oyo azalaki kosala bikamwa kosala ndenge moko lelo, ndenge Asalaki na eleko wana, mpe makambo bobele moko oyo bazali kosenga ezali: “Tika námona yo kosala *boye na boye*.” Bolobaka ete Erode akozala na esika ya mpasi? Moto ya lelo oyo akozala na esika ya mpasi koleka! Erode azalaki na makambo oyo basakoli ná bato na bwanya babikeláká na mibu nkóto minei. Bisu tozui mibu nkóto motoba, ná malakisi minene koleka oyo bango bazuaki na eleko wana. Na ntembe te. Esalaki mpenza likambo! Ezali mpe bongo lelo, ndenge moko!

<sup>59</sup> Likambo ezalaki nini? Erode atikálá kolandela yango mpenza te. Atikálá kotelema te mpo na kotala likambo yango solo.

<sup>60</sup> Ezali mpe bongo mpo na bato ya lelo. Bamonaka likambo monene oyo, ekamwisaka bango, kasi batelemaka ntango molai oyo esengeli te. Balukaka koyoka rabuni to moto na likindo moko boye, oyo alimbolaka Yango ndenge mosusu mpenza. Nzokande, ntango nakanisaka na ntina na Jeffersonville: “Mbala boni nalingaki kotia bino na nse ya mapapu lokola mama soso asangisaka bana na ye, kasi bolingaki te. Mbala boni nalingaki kosangisa bino? Mbala boni nalingaki kokómisa esika oyo e—esika ya elanga, epai oyo bikólo nyonso elingaki koya mbangu, kasi bolingaki te.” Bomoni? Bomoni?

<sup>61</sup> Sikawa, bomoni likambo Erode akosengela komikanisela mokolo wana? Libaku monene oyo epesamelaki ye, aboyaki yango. Mpe kuna na esika moko boye, na bisika ya babúngi, na mpokwa oyo, azali komikanisela oyo asalaki na yango. Ntango esili koleka sikawa.

<sup>62</sup> Bótika te ete ézala bongo mpo na biso. Oyo nde ntango na biso ya boyeneli. Tómkanisela Klisto, ete Azali ndenge moko

lobi, lelo mpe libela, Baebele 13:8. Kozela te kino okokóma na bisika wana, ya babúngi, na mosánda oyo okoki kokende Liboso na Nzambe te, mpe ntango na yo na mokili esili, na kati ya ndoto ya nsomo, okomikanisela ete libaku epesamelaki yo, kasi oboyaki yango. Bilenge báyoka likambo oyo na bokebi. Bato nyonso báyoka yango na bokebi.

<sup>63</sup> Erode atikálá kolandela likambo yango mpenza te. Na libaku bobele moko oyo epesamelaki ye, asengaki bobele ete básepelisa ye, ete Yesu ásala eloko moko boye ya solóka, ábimisa lapin moko na ekoti, to, boyebi, to eloko moko bongo. Akanisaki ete Akokaki kozala, na elobeli mosusu, azalaki komona Ye lokola moto na solóka. “Toyokaki ete yo okoki kosala maseki. Tika námona Yo kosala liseki na Yo sikawa.”

<sup>64</sup> Mpe bótika náloba boye, na limemia mpenza. Kasi mbala mingi, batei ya maloba ya lelo balobaka: “Soki Molimo Mosanto moko ezalaka, soki ondimaka ete Molimo Mosanto ezali mpenza ndenge ezalaki na ebandeli, tika námona yo kozua mobange *Songolo-pakala* awa, to *oyo*, oh, mobali *oyo* awa, mwasi *oyo* awa. Nakokende kozua bango. Tika námona yo kosala yango.”

<sup>65</sup> Bayebaka ete ezali kaka molimo yango moko (te, bazoyeba te) ete Yesu alobaki: “Soki Ozali Mwana na Nzambe, zua, kómisa mabanga oyo lipa. Soki Ozali Mwana na Nzambe, yebisa biso nani abeti Yo na motó. Soki Ozali Mosakoli, yebisa biso nani abeti Yo,” ná elamba bakangi Ye na elongi. Babetaki Ye na motó, na nsima balekisi fimbo yango bamoko na bamosusu, balobi: “Yebisa biso, soki Ozali Mosakoli. Yebisa biso nani abeti Yo, bongo tokondima Yo. Yebisa biso, soki Ozali Mwana na Nzambe. Tozali sembo na mitema. Soki Ozali Mwana na Nzambe, kita na ekulusu mpe tokondima ete Ozali Mwana na Nzambe.”

<sup>66</sup> Nazali komituna soki bato mingi lelo, mibali, basi, bilenge mpe mikólo, bakomi na esika moko yango te. Mpe bokomikanisela, mokolo moko, ete bozalaki Liboso na Ye, na Liziba na Ye; kasi bozalaki na mposa ya komona liséki moko, to bozalaki na mposa ya komona osiso moko to eloko moko bongo: “Ekosala ete nándima Yango. Náyoka malili na mokongo na ngai, mpe násama *boye* to *boye*, nakondima Yango.” Bomoni, koningana moko boye, ezali mpenza losambo ya bikeko! Ná. . .

<sup>67</sup> Boyebi, Yesu alobaki, na likambo moko, Atunaki motuna moko. Nakosepela kotuna yango na losambo na mpokwa oyo. Yesu alobaki: “Mpo na nini? Mpo na nini? Mpo na nini bobengaka Ngai ‘Nkolo’ na bino, kasi bosalaka te makambo oyo Natindaka bino kosala? Mpo na nini bokoki kobenga Ngai ‘Nkolo,’ kasi botosaka Liloba na Ngai te? Mpo na nini okoki kobenga Ngai ‘Nkolo,’ kasi bowanganaka makambo oyo Natindaki bino koteya mpe kolakisa?” Ezali nini? Eloko nini esalaka bongo? Ezali mpo mimesano moko ya ba-dénomination etelemaka katikati na bango ná Liloba. Mpe eloko nyonso oyo etelemaka katikati

na yo ná Nzambe, ezali nzambe ekeko, ezui esika ya Nzambe. Mpo na nini bolobaka: “Nkolo”? *Nkolo* elingi koloba “bokuli,” Nkolo nde mokólo eloko. Mpe soki Nzambe azali mokólo na ngai, soki nazali ya Ye, mpe Abongolaki ngai mokolo moko ntango nazalaki kolanda nzela ya mabe, mpe abengi ngai na ntina, nasengeli kosala nini, soki bobele kokokisa mposa na Ye te, ndenge Asalaki mpo na Paulo. Ndenge nini nakoki kosala likambo mosusu, koleka kotosa Liloba na Ye? “Mpo na nini bobengaka Ngai ‘Nkolo’?”

<sup>68</sup> Nalingi kolobela moto mosusu awa, kotala likambo na ye. Ezali boni mpo na Yudasi, amikaniselaka Ye na likambo nini? Tozali kolobela komikanisela Nkolo. Yudasi, na mpokwa oyo mpe, oh, kino ntango akozala lisusu te, akosengela komikanisela ete atekaki makoki na ye ya bokulutu. Atekaki Yesu mpo na litomba na ye moko. Totiolaka Yudasi. Tolobaka ete azalaki moto na nkanza mingi, ete abongi na esika moko te to na mboka moko te, ete abongi na Lola te. Mpo na nini? Atekaki Nkolo na ye, nsima na ye kozua libaku ya kozala ata mo—moyekoli, ya kozala ntoma, kobengama oyo eleki likoló na Biblia, ezali likoló koleka mosakoli. Azuaki libaku ya—ya kozala ntoma, kasi atekaki makoki yango mpo na litomba na ye moko. Sikawa asengeli komikanisela yango. Ndenge wana nde ye amikaniselaka Yesu: litomba na ye moko.

<sup>69</sup> Mpe nazali komituna batei boni ya lolenge wana, na mpokwa oyo, ata batelemaka na eteyelo, ata balataka nzambala ya korale, bafandaka na kiti ya mosungi, to bazuaka ebonga ya mobombi misolo, ya moyangeli misolo, to ya nini, mosala na ye na lingomba, to motei na eteyelo, kasi kino lelo, bazali koteka libaku na bango mpo na lokumu na bango moko: “Molakisi, Episikopo *Songolo*” mpo na lokumu na ye moko, mpo na litomba na ye moko.

<sup>70</sup> Moto moko alobaki na ngai mokolo moko: “Nandimi ete ezali Solo. Kasi soki natei yango, nakokóma moséngi-sengi na balabala.”

<sup>71</sup> Bozali komikanisela elenge mozui ná Lasalo, nsuka na bango mpe esika bakosuka Seko na bango? Atako moko azalaki na . . . azalaki mosengi-sengi, mpe mosusu azalaki mozui, kasi likambo ebongwanaki mokolo moko, mpe bango mibale bamikaniselaki. Boye, na mpokwa oyo, bato bazali koloba makasi na ntina na Yudasi oyo atekaki Ye mpo na litomba na ye moko, mpe bato mingi mpenza bazali kosala ndenge moko lelo, bazali koteka Ye mpo na litomba na bango moko.

<sup>72</sup> Nganganzambe ya eleko wana mpe akomikanisela ete atekaki libaku oyo Apesaki ye, libaku ya kokóma mosali na Ye, ya kokóma moyekoli na Ye, ya kobongola motema epai na Ye. Batekaki yango mpo batondaki na zuwa ya mabe mingi. Bazalaki na zuwa ya Malakisi na Ye. Ee, wana Azalaki bobele na mibu

zomi na mibale, Akokaki kosilisa bango ata ndenge nini; kasi bayebaki yango te, ete wana ezalaki Masiya. Bazalaki na makoki ya kosala makambo Ye azalaki kosala te. Mpe bazalaki kobanga ete bábungisa lokumu na bango liboso na bato ya mosánda ya likoló, mpe batekaki libaku na bango. Bango mpe bakweisami kaka ndenge Erode azalaki.

<sup>73</sup> Mondimi ya lingomba ya lelo mpe azali ndenge moko. Soki batiaki motema na ba-dénomination na bango mpe nyonso wana, na eleko wana, mpe bazalaki kobanga mpo na lokumu na—na bango, ete bakobengana bango na ba-sinagoga, ezalaki nini na eleko wana? Ezalaki losambo ya bikeko! Bazali kosambela bindimeli ya bikeko to mangomba ya losambo ya bikeko, na esika ya koyamba Liloba na bomoi oyo etalisamaki liboso na bango.

<sup>74</sup> Mpe bamonaki Liloba na Nzambe. Biblia elobi: “Tomonaki Ye mpe tosimbaki Ye.” Na maboko na bango, bato basimbaki Liloba mpenza ya Nzambe na bomoi, oyo etalisamaki; kasi batiki mimesano ná bindimeli ételema katikati na bango, ya kosukola bambeki ná basani, makambo ya mbindo mpenza ételema katikati na bango ná Nzambe na bomoi. Iyo.

<sup>75</sup> Ezalaki nini? Bamisalelaki makanisi na bango moko. Bamisalelaki makanisi na bango mko oyo ezalaki kotelemela Makomi, Nsango-malamu na Ye ya peto, ya sikisiki, oyo Azalaki kolakisa, Liloba ya Tata. Bazalaki koyokela Ye zuwa. Bazalaki na makanisi oyo etelemelaki Ye. Mpe na ntango nyonso oyo bakozala na ekaniseli, elingi koloba, wana bazali naino na ewelo, bakokoba komikanisela, ndenge wana nde bakokaniselama. Ndenge wana nde bakosengela komikanisela Ye.

Okoloba: “Oh, oyo wana ezalaki Bafalisai.”

<sup>76</sup> Mama moke moko oyo azaláká koya na losambo oyo. Oh, nabanzi, ntango mosusu, ete mingi kati na bino boyebi ye, afandaka awa, na balabala oyo, kuna na nse. Asila kokweya. Mbala nyonso namonaka ye, ayaka mbangu epai na ngai, asimbaka ngai na maboko: “Ndeko Bill, bondela mpo na ngai. Nasili kozonga nsima.” Mobali na ye azali. . . Te, nakanisi ete bafandaka kaka awa na balabala oyo. Namonaki ye na Molimo, namonaki Molimo ya Nzambe likoló na ye, mpe azaláká kobina, kosepela, mpe bongo na bongo. Asiláká kokweya. Mpe eleki ntango molai te, akotaki lopitalo awa, azalaki kobunda na liwa, ndenge bakanisaki. Mpe abengisaki ngai mpo náya kobondela mpo na ye.

<sup>77</sup> Ye ná mobali na ye bazalaki mpenza bato malamumu mpo na mwasi na ngai, ntango mwasi na ngai azalaki naino mwana moke, na bilamba enzuluuka mpe salité na elongi, mpe bazalaki kosombela ye mwa robe to eloko mosusu, mbala na mbala, mpo na kosunga ye ákende na kelasi. Ata likambo yango ezali moke ndenge nini, okoki kosala eloko moko te mpo na Nzambe, kozanga ete Ámikanisela yango. “Mbala nyonso oyo bosalaki



makambo wana epai na ye oyo aleki moke kati na bato na Ngai, bosalaki yango nde epai na Ngai.” Mpe lokola lipa likoló na mai, ekozonga.

<sup>78</sup> Mwasi yango, oyo asilaki kozonga nsima, alalaki wana, azalaki kolela, wana asimbaki loboko na ngai. Mpe ye. . . Ngai nalobaki: “Ee, ndeko mwasi, nako—nakobondela mpo na yo.”

<sup>79</sup> Mpe mwasi moko alalaki na mbeto oyo ezalaki pembeni na oyo ya ye, akangaki maboko mpe azalaki kotala ngai. Mpe elenge mwana na ye ya mobali afandaki pembeni na ye, azalaki pene na mibu ntuku mibale, Ricky moko ya mikolo oyo mpenza.

<sup>80</sup> Boye, ezali te mpo na kozanga limemia na moto oyo nkombo na ye Ricky, kasi nalingi koloba ete ezali. . . nkombo ya ndenge wana ezalaki te na ntango ya kala. Elvis ná Ricky, ezali bankombo ya eleko oyo, bomoni. Soki ozali na mwana oyo azali na nkombo yango, béngaka ye na nkombo na ye oyo mosusu, na bongo, to pesa ye nkombo moko.

<sup>81</sup> Ntango afandaki wana ndenge wana, atalaki ngai, mpe ntango nabandaki kogumba motó, namonaki ye kokóma mpenza. . . Alobaki: “Zela naino! Benda ridó wana!”

<sup>82</sup> Nalobaki: “Nalingaki bobele kobondela mpo na mwasi oyo. Yo ozali—ozali mo—mondimi te?”

<sup>83</sup> Alobaki: “Yoka sikawa, biso tozali ba-Methodiste, mpe tolingi yo óbenda ridó wana!”

“Iyo, madame,” mpe nabendaki ridó yango.

<sup>84</sup> Bomoni, ndenge moko. Ndenge moko lelo, basílá komisalela makanisi mingi! Ayebaki lolenge ya motei nini ngai nazalaki? Natikálá komona mwasi yango te. Kasi ntango mosusu ayokáká moto moko koloba ete ngai nandimaka lobiko ya babeli, mpe batéyá ye malakisi oyo etelemelaka yango. Azalaki na ntina na yango te, asukolaki maboko na ye mpo na kolongola yango. Azalaki kobanga ete ékweyela ye. Komitungisa te, ekokoma te, kaka ndenge Pilato akokaki kolongola yango te na kosukoláká maboko.

<sup>85</sup> Sikawa, nalobi yango te mpo na kotiola ba-Methodiste; oyo wana ezalaki kaka mwasi moko. [Maloba mazangi na eteni oyo ya bande—Mok.] Bomoni? Ekokaki kozala bobele lolenge oyo ya ye. Nandimi te ete ba-Methodiste nyonso bazalaka ndenge wana, mpo nabondélá mpo na mingi kati na bango. Babéngaka ngai mpo nábondela mpo na bango, mpe bilembo mpe bikamwa esílá kosalema katikati na bango. Ezalaka bato oyo basambelaka na mangomba wana te; ezalaka nde système oyo ekangi bango, yango nde esalaka bongo. Kasi mwasi yango azalaki moko na baoyo ya lolenge yango. Ezalaki nini? Atondaki na zuwa ya mabe mingi, oyo ya zabolo mpenza.

<sup>86</sup> Nakoki koloba likambo moko. Na—na liyangani moko boye oyo ezalaki awa na engumba oyo na ntango moko, batunaki

bango mpo na nini babengisaki ngai kuna te. Kasi nakolobela yango te mpo nazali epai na ngai. Kasi, ata bongo, ntina moko ezali te, ezali bobele zuwa, ezali bindimeli, ezali losambo ya bikeko. Tolingaka mpenza koyamba moto nyonso, kasi soki batii yo pembeni. . . Yesu azalaki na mposa ya kosala yango. Bomikanisela, mokolo moko bosengeli komikanisela yango. Bosengeli komikanisela yango.

<sup>87</sup> Ekundolisi ngai litatoli moko oyo euti kopesama kala mingi te. Motei moko azalaki komata na ascenseur moko, awa na Immeuble ya Heyburn. Mpe mibali misato bazalaki elongo na motei yango na—na ascenseur yango, kasi ba—bayebaki te ete mobali yango azali motei, nabanzi te. Mpe wana bazalaki komata, bango nyonso batelemaki na étage ya mwambe. Mpe mobali moko atalaki motei yango, mpe alobaki: “Oyebi nini? Oyo ezala na yango pene mpenza na Lola koleka oyo tokotikaláká kokóma.”

<sup>88</sup> “Ee,” motei yango alobaki, “na—nabanzi olobi solo. Na—nabanzi ete olobi solo mpo, na ntango nyonso oyo tokotia motema na makoki na biso moko, oyo nde pene mpenza tokotikaláká kozala.” Ya solo. Na ntango nyonso oyo okotia motema na oyo osalaka, okomikanisela oyo osálá. Mpe nandimisami ete mingi kati na biso toyebi ete tosalaki eloko moko te, tolóngobani na eloko moko te. Alobaki: “Nabanzi ete soki totii motema na makoki na biso moko, oyo nde mosika mpenza tokotikaláká kokende.” Ee, soki totii motema, wana nde mosika mpenza tokotikaláká tokende.

<sup>89</sup> Kasi, oh, nalingi koloba likambo moko. Soki nakoki kobosana oyo ngai nazalaki, mpe komikanisela oyo Ye azali, soki nakoki komikanisela Yesu, soki nakoki komikanisela Ye na ekulusu, soki nakoki komikanisela oyo Ye asalaki mpo na ngai, mpe soki nakoki komikanisela ngonga oyo Asukolaki masumu na ngai, mpe Apesaki ngai Molimo Mosanto mpo na kokamba ngai, na bongo nakotombwama likoló na nyonso oyo ekangaka mokili oyo. nakotombwama likoló na biloko nyonso ya mokili, nakokóma kino na bisika bileki Likoló kati na Klisto Yesu, epai nakoki kozala na bondeko elongo na Ye. Kuna, Liboso na Ye, kobosana oyo ngai natikalá kozala, kobosana masumu na ngai nyonso mpe nyonso wana, mpo ezali kati na Mbu ya Kobósana. Kobosana makambo na ngai nyonso ya kala, kobosana nyonso, mpe komikanisela ete Akómísá ngai ya Ye mpenza, na nzela na liwa na Ye mpenza. Azuaki esika na ngai. Mpe ngai oyo nazalaki na makoki ya kokende esika mosusu te bobele na lifelo, Azuaki esika na ngai mpe Atombolaki ngai longwa na lifelo. Akendeki kuna mpo na ngai. Mpe Atombolaki ngai na ngolu na Ye monene, na lolenge ete sikawa tokómi bana na Nzambe ya mibali mpe ya basi, mpe tofandi na bisika bileki Likoló kati na Klisto Yesu, na esengo ya libela mpe na komikaniseláká Ye Oyo akómisi biso na kimia kino awa. Mpe na kondima oyo ezali koningana kati na

elimo na biso, oyo ezali kotinda biso, mpe na ngolu, Akokoba komema ngai.

<sup>90</sup> Mpe na miso ya kondima, nazali komona Likomi na Ye kokokisama ete: “Baoyo nyonso Ayebaki liboso, Abengi bango; baoyo nyonso Abengaki, Alongisi bango; mpe baoyo nyonso Alongisi, Apesi bango nkembo.” Na yango, ná likambo oyo na makanisi, natelemi kati na eyanganelo ya bato, epai Molimo ya Nzambe ezali, mpe bato bazali kotómbwama mpo na kofanda na bisika bileki Likoló kati na Klisto Yesu. Kozeláká ngonga oyo elilingi mabe ya bomoi ya moto, oyo ezali na motema oyo ekokufa, mpe oyo esengeli kotelema mokolo moko, ntango ekobongwana mpe ekopesamela motema ya Molimo oyo ekobeta kozanga kotelema na ntango oyo ekoki kopímama te, oyo ezali koya, kozanga bokono, kozanga mawa, kozanga kokóma mobange to nini.

<sup>91</sup> Mikaniselaka Yesu. Ntango engongolo etikali mpamba na ndako, fufu esili, mikanisela Yesu. Ntango monganga alobi ete elikia ezali lisusu te, mikanisela Yesu. Ntango zaboló azali kosénginia yo; ndenge toyembaka ntango tokabwanaka, “wana masenginia mazingi biso, loba Nkombo Mosanto wana na libondeli.”

<sup>92</sup> Komikanisela Yesu, komikanisela ete Akozonga. Bobele Yesu oyo alongolamaki kati na biso akozonga lisusu ndenge tomonaki Ye kokende na Likoló. Bomikaniselaka, Akozonga mpo na kozua baoyo ya Ye mpenza.

<sup>93</sup> Tóbondela. Mpe wana togumbi mitó, mpe ná mwa Nsango ekatana-katana oyo ezali naino na motema na yo, okolinga ete Akanisa yo sikawa? Soki olingi yango, tombola loboko, mpe senga eloko moko ya libanda na momesano: “Nkolo, kanisa ngai.” Ndenge moyembi alobaki: “Kanisa ngai ntango mpisoli ezali kokita.”

<sup>94</sup> Tata na biso Oyo Aleki Mosantu, tosepeli mpenza na bozali ya Molimo Mosanto, wana Azalaki kolakisa biso Liloba na Bomoi, wana tozali komikanisela libulu ya bozindo epai wapi tobimisamaki mpe sikawa tosili kobimisama na libulu yango mpe kopesamela lolenge ya bana na Nzambe, na ngolu na Yesu Klisto. Namikaniseli Ye, ntango monganga moko atalaki ngai na miso mpe alobaki: “Atikali bobele na miniti moke,” namikaniseli Yesu. Namikaniseli Yesu, ntango nazalaki kolela na etumbelo mpo na kosenga mawa, mpe elimo na ngai ezalaki na mokumba, namikaniseli mokumba oyo etikaki ngai. Yesu azuaki mokumba na ngai. Eleki mwa basanza, nafandaki na ebonga, nazalaki kotala na talatala ya bondóki moko, mpo na kobeta masasi na cible, na ntembe te Satana amilobelaki: “Oyo nde libaku na ngai sikawa.” Mpe bondóki yango epanzanaki, mpe tiyó, libaya ná ebételi epalanganaki, mpe móto epanzanaki zingazinga na ngai, mpe namekaki kotelema, mpe makila ezalaki

kobima mingi, namikaniseli ete ezalaki Yesu. Ntango monganga, ntango atalaki mpe amonaki ete esalaki ngai mabe moko te, alobaki: “Eloko bobele moko oyo nayebi ezali ete, na ntembe te, Nkolo mpe afandaki wana, mpo na kobatela mosali na Ye, asengelaki kopanzana na biteni-biteni na kopasuka ya ndenge wana.” E Nzambe, ndenge biso nyonso tozali komikanisela makambo yango!

<sup>95</sup> Toyei na Liziba oyo etondi na Makila oyo eutaki na misisa ya Emanuele. Pambola biso, Nkolo, elongo na mpokwa oyo. Oyebi mposa mpe—mpe ntina oyo ezali na motema ya moto nyonso oyo atombolaki loboko. Oyebi mposa mpe bosenga yango. Mpe lokola mosali na Yo, Nkolo, na—naye elongo ná bango, mpe—mpe tobimi na tabernacle oyo sikawa, na kondima, tomati, koleka mapata, sanza, minzoto mpe Mosánda ya—ya Nzilá Ya Elanga, mpe sikawa tokómi Liboso na Nzambe. Mpe etumbelo monene ya wolo yango oyo liboso na ngai, Mbeka oyo tozali komikanisela etiami wana likoló na yango, Yesu, oyo alobaki: “Bósénga nyonso na Tata na Nkombo na Ngai, Nako—Nakokokisa yango.” Tika ete kondima na biso ékweya te, Nkolo, kasi ete tómkianisela ete tozui oyo tosengi, soki tondimi yango, wana tozali komikanisela ete Yesu akufaki mpo na kopesa biso yango mpe mpo na kondimisa biso.

<sup>96</sup> Nkolo, tomoni ete Ozali koyeisa ndakonzambe na biso monene. Yo nde osali yango mpo na biso, Yo nde osali ete ndakonzambe na biso éyeisama monene. Mpe toyebi ete Yo, Nkolo, nde opesaki biso losambo yango na ebandeli. Tobondeli ete Ópambola makasi yango.

<sup>97</sup> Nkolo, tobondeli mpo na mokengeli na biso, Ndeko Neville, mosali na Yo ya sembo, ya komikitisa mpe ya malamú. Abelemaka mpo na kosala mosala ata na esika nini, ézala mpo na kofanda na kiti ya nsima to mpo na kokómba losambo. Esika nyonso Ozali na bosenga na Ye, alingi kozala wana lokola esalelo, mpo na kosalela Yo na bisika nyonso Obéngaka ye. Tobondeli, e Nzambe, ete—ete Ópambola ye.

<sup>98</sup> E Nzambe, momekano monene oyo nauti koleka kati na yango, bayangeli misolo oyo batelemaki pembeni na ngai, mpe losambo oyo—oyo babondelaki mpo na ngai, mpe sukasuka elónge ezuami. E Nzambe, nabondeli mpo na bango. Ngai mpe namikaniseli bango, Nkolo, mpe nandimisami ete Omikaniseli bango.

<sup>99</sup> Tomikaniseli mapamboli oyo Osili kozala epai na biso. Mpe tomikaniseli Liloba na Yo oyo elobi ete Yo okotikáká biso te mpe okosundoláká biso te. Bobange etali yango na eloko moko te, Okokoba komikanisela biso, ntango mokili ekozala lisusu te mpe ntango ekolimwa kati na Seko. Ekomámá, eloko moko ya boye: “Mama akobosana nde bebé na ye? Ngai nakoki kobosana bino ata moke te. Bankombo na bino ekomámá na maboko

na Ngai,” bansete nde ekomaki bankombo na biso. Toyebi ete Omikaniselaka biso, Nkolo.

<sup>100</sup> Mpe tika ete Ózalaka ntango nyonso kati na bikaniseli na biso ya kitoko mingi koleka, lokola Mobikisi ya milimo na biso, Mobikisi ya banzoto na biso, Mokonzi na biso, Molingi na biso, Bomoi na biso, Mói na biso, Nyonso kati na Nyonso na biso, liziba oyo ekaukaka te, ya ngolu mpe bolingo na Nzambe, mpo na biso bato ya libota ya Adama oyo tokweyaki. Kokisa yango, Nkolo, wana tomipesi epai na Yo sikawa, tolingi kobima na tabernacle na mpokwa oyo, wana tozali komikanisela Yesu. Amen.

<sup>101</sup> Bozali komikanisela Ye? Bolingi Ye? [Losambo balobi: “Amen.”—Mok.] Sikawa nakanisi, na mwa Liteya na biso oyo ebukana-bukana, tokoki koloba boye. Polo alobaki: “Nyonso tokosala, tokosala yango na Molimo.” Na makambo nyonso, tosengeli komikanisela Ye. Tózuaka mokano moko te kozanga komikanisela Ye; tósalaka eloko moko te, mpo ekozala bolema. Soki monguna abeti na litama moko, tómikanisela ndenge Ye asalaki, liboso tózungisa. Tómikaniselaka ndenge na Ye ya kosala. Soki mokano moko esengeli kozuama, tózelaka, tómikaniselaka lolenge ya mokano oyo tokanisi ete Ye alingaki kozua, na bongo, yango nde ézala mokano na biso. Soki tolingi kosala makambo mbangu-mbangu, tómikaniselaka ete Ye azalaki kosala makambo mbangu-mbangu te. Bomoni? Soki tokómi motema likoló-likoló, mikanisela ete Ye afandaka kati na Seko, ntango ezali na ntina te epai na Ye. Mposa mpe ntina ya motema na biso nde ezali na ntina. Tómikaniselaka Ye.

<sup>102</sup> Mpe tómikanisela Ye sikawa, wana tozali koyemba loyembo oyo, na Molimo ya Bozali na Ye, *Nalingi Ye*. Soki ofandaka kati na bolingo, ofandaka kati na Nzambe, mpo Nzambe azali bolingo. Baoyo bafandaka kati na Nzambe bafandaka kati na bolingo. Bomoni? Mpe bolingo ezalaka na koyina te. Bolingo ezalaka na zuwa te. Bolingo evimbaka na lolendo te. Bolingo ezalaka na bizaleli ya mabe te. Bolingo ezalaka ntango nyonso na bolamu, boboto, elimbisaka, malamumu. Ata bamosusu bakómi bololo ndenge nini, bolingo etikalaka kaka bolingo. Bolingo ezali bofuluki ya ngolu. Bolingo ezali etemelo ya nsuka oyo Nzambe atalaka mpo na biso. Nsima na makabo mosusu nyonso mpe biloko mosusu kolimwa, masakoli na biso, minoko na sika na biso, bandimbola na biso, nyonso oyo tosilá kosala, to eloko nini mosusu, ntango bolingo eyei, yango nde etemelo ya nsuka. Ezali likoló na nyonso, mpo nyonso mosusu ekweyaka. Ezali—ezali mokano ya Cour Suprême. Ezali Ekanganelo. Ezali Monzoto ya Nordi oyo ebatelaka basali na masuwa na nzela malamumu. Ezali Busóle oyo ekambaka biso. Bolingo nde eloko ya nsuka. Tómikanisela yango, wana tozali koyemba: “Nalingi Ye.”

Nalingi Ye, nalingi Ye  
Mpo Alingaki ngai liboso  
Mpe Asombi lobiko na ngai

Likoló na Ekulusu.

Nalingi Ye, nalingi Ye

Mpo Alingaki ngai liboso. . .

Sikawa bómikanisela: “Alingaki ngai, mpe Apesaki Mwana na Ye.”

Mpe Asombi lobiko na ngai

Likoló na Ekulusu.

<sup>103</sup> Sikawa wana ndeko na biso ya mwasi azali kobetela biso loyembo yango. . . [Ndeko Branham azali koyemba na nse ya mongongo *Nalingi Ye*—Mok.] Tika ete, na bopolo ya bondeko, wana tofandi elongo na bisika bileki Likoló kati na Klisto, sikawa, bimisa nyonso, nyonso na motema na yo. Mpe bómikanisela, Liloba na Nzambe nde elobi bongo. Nazali mosali na Ye. Azali awa. Na bongo, tópesa moto moko mbote ya loboko, mpe tóloba: “Nzambe ápambola yo, ndeko.” Soki ozali na moyini moko, telema mpe kende epai na ye, bomoni: “Nzambe apambola yo, ndeko,” wana tozali koyemba lisusu refrain yango mpe kopesana mbote ya loboko. Bokoki kosala yango sikawa, na bopolo mpenza kati na Molimo.

Nalingi Ye, (Nzambe apambola yo, Ndeko

Roy). . . lingi Ye

Mpo. . . lingaki ngai liboso

Mpe Asombi lobiko na ngai

. . . ? . . . Wana totomboli maboko.

Nalingi Ye, nalingi Ye

Mpo. . . (Bómikanisela Yesu!)


Mpe Asombi lobiko na ngai

Likoló na Ekulusu.

<sup>104</sup> Sikawa tógumba mitó mpe tóyemba yango na nse ya mongongo. Komikanisela Yesu!

. . . lingaki ngai liboso.

[Ndeko Branham abandi koyemba na nse ya mongongo.]

<sup>105</sup> Sikawa wana ndeko na biso ya mwasi azali kobeta yango, na bopolo mpe malembe, nakosenga na ndeko na biso ya malam. . . Ndeko Neville, ozali na liloba oyo olingi koloba, ata likambo nini? Malam. Nakosenga na Ndeko Collins, kuna na nsima, elenge ndeko na biso ya bosembo awa, moko na bandeko na biso na mosala, soki akolinga kosilisa liyangani na biso na libondeli. Wana togumbi mitó, Ndeko Collins. 

62-1209 Komikanisela Nkolo  
Branham Tabernacle  
Jeffersonville, Indiana U.S.A.

LINGALA

©2025 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamú ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, koméla:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)